

**Naalakkersuisunut apeqqut: Qamutininik motorilinnik Kalaallit Nunaanni nakkutilliinerup unitsinneqarsimasup kingunerisaanik ajornartorsiutaasut aaqqiiviginiarlugit Naalakkersuisut sulianik qanoq ittunik ingerlataqarpat?**  
(ATASSUT-ip Inatsisartuni ilaasortaataitai: Finn Karlsen, Siverth K. Heilmann, Knud Kristiansen)

**Akissuteqaat.**

(Ineqarnermut, Attaveqarnermut Angallannermullu Naalakkersuisoq)

Aallarniutigalugu soqutiginninnermut Naalakkersuisut qujapput, tamatumunngalu tulliullugu Inatsisartut 2008-mi upernaakkut ataatsimiinnisa kingorna suliap ingerlasimanera nassuiaatigissallugu.

Inatsisartut 2008-mi upernaakkut ataatsimiinnerat malitseqartillugu Danmarkimi Transportministeriaqarfik, Kalaallit Nunaanni qamutininik motorilinnik misissuisarnermi ministeriaqarfittut oqartussaasuusoq attaveqarfigineqarpoq. Kalaallit Nunaanni qamutininik motorilinnik misissuisarnermut tunngatillugu nassuiaateqaqqullugit kiisalu pilersaarutininik aalajangersimasunik saqqumiusseqqullugit qinnuigineqarput. Tamatumunnga atatillugu aamma Kalaallit Nunaanni qamutininik motorilinnik misissuisarnerup namminersortunngorsarsinnaanissaannut isummeqqullugit qinnuigineqarput – soorlumi Danmarkimi tamanna 1999-imi pisimasoq.

Arlaleriarluni saaffiginnittoqartaraluartoq (2008-mi septembarimi kiisalu 2009-mi apriliimi) nassuiaat taanna nassiuuneqanngilaq. Taamaammat apeqqut taanna 22. juni 2009-mi naalagaaffeqatigiit ataatsimiinneranni saqqummiunniarlugu Naalakkersuisut aalajangerput.

Naalagaaffeqatigiit ataatsimiinneranni Transportministeriaqarfik allakkiamik, oqartussaasutut akisussaaffiup Kalaallit Nunaannut nuunneqarsinnaaneranut periarfissanik nassuiaaffiusumik saqqummiussaqqarpoq. Tamatuma kingunerisussaassavaa Kalaallit Nunaata qamutininik motorilinnik misissuinermik suliaqarnermut akisussaaffik sulisussanik qamutininik motorilinnik misissuisussanik atorfinitsitsinermigut tigusariaqassagaa, kisiannili aamma aningaasaqarnikkut nammagassat tigusariaqassallugit.

Siunnersuut taanna aaqqiissutissatut naleqquttutut isigineqanngilaq, taamaattumillu oktobarip ulluisa aappaanni allaffeqarfik allakkiamik Transportministeriaqarfimmuut nassiussivoq, tassanilu nalunaarummik nassiussisoqarnissaa aammaloorluta qinnutigaarput, kiisalu Kalaallit Nunaanni qamutininik motorilinnik misissuisarnerup aallartinnissaanut pilersaarummik nasseqqulluta. Aaqqiisoqassappat Danmark suliaassap ingerlanneqarnissaanut aningaasanullu tunngasortaanut oqartussaasutut eqqortutut akisussaaffeqarnerminik nassuerutiginnittariaqartoq tassani erseqqissarneqarpoq. Allakkiami tassani ATASSUT-ip Naalakkersuisunut apeqqutaata akinissaanut oqaaseqaatinik saqqummiusseqqullugu Transportministeriaqarfik qinnuigineqarpoq.

Transportministeriaqarfiup saaffiginnissuterput oktobarip ulluisa 15-anni akivaa, tassanilu Kalaallit Nunaanni angallannermut inatsit naalagaaffiup isumagisassarigaa nassuerutigineqarpoq, aammalu suliaasaqarfiup tunniunneqarnissaa siunnerfiginngikkallaritsik nalunaarutigineqarluni. Danmarkimi suliaasaq

namminersortunngorsarneqarsimasoq, aammalu atuisunit tamakkiisumik aningaasalersorneqartoq, taamaattumillu misissuisarnermut aningaasartuuteqartoqarneq ajortoq erseqqissaatigineqarpoq.

Transportministeriaqarfik suliassap taassuma aaqiiffigineqarnissaanut Namminersorlutik Oqartussanik oqaloqatiginninnermik aallartitserusuppoq, tassanili Kalaallit Nunaanni qamutitik motorilinnik misissuisarnermut atuisunik akiliisitsisalernikkut suliassap Danmarkimut aningaasartuutaannginnissaa piumasarineqarpoq.

Inatsisartut 2008-mi upernaakkut ataatsimiinneranni ATASSUT-ip apeqquaqqaataani Kalaallit Nunaanni suliassap namminersortunngorsarneqarneratigut suliassaq pitsaanerusumik iluarsiiiffigineqarsinnaanersoq apeqquutigineqarpoq.

Transportministeriaqarfik tamatumunnga tunngatillugu nalilivoq, Kalaallit Nunaanni aaqqissuussinnermik assingusumik atulersitsinissaq annertuallaamik aningaasartuuteqarfiusussaassasoq, taamaattumillu Danmarkimi suleriaaseq Kalaallit Nunaannut nuunneqassappat tamanna naapertuutissanngitsoq.

Erseqqissaatigissavarput, suliap taama sivilutigisumik ingerlasimanera Naalackersuisuniit naammaginnginnatsigu. 1999-illi kingorna Kalaallit Nunaanni misissuisoqarsimannngimmat naammaginngilarput, aammalu Kalaallit Nunaanni qamutit motorillit pigineqartut misissorneqarnissaat, taamaalillunilu aqqusinerni isumannaassutsip annertusineqarnissaa kissaatigisorujussuarput.

Tamanna pissutigalugu apeqquutip matuma akineqarneranut peqatigitillugu Kalaallit Nunaanni qamutitik motorilinnik misissuisarnermik aallartitsinissamut periarfissat pillugit Transportministeriaqarfimmut toqqaannartumik saaffiginnissuteqarpugut. Aaqqiissutissamik, Inatsisartunit naammagisimaarnartutut isigineqarsinnaasumik nassaarniarluni sulineq ilungersuullugu ingerlanneqarpoq.